

"EKEMA"



Marsicht hiet ear-  
tiids Ekema.

## Pleatsen mei âlde nammen yn 'e Bird by Grou

Sa'n opskrift boppe jins artikel hat in moaije klank. Pleatsen mei âlde nammen yn 'e Bird by Grou. Spietich dat it net altyd wier is.

De pleats dy't neffens myn reisplan nou oan bar wie en neffens de kaert fan Eekhoff „Ekema” hjitte moast, pronke nou mei de namme „Mar-sicht” op in noch nijestich foarlein. Nou wol ik net sizze dat dit net in goede namme is, hwant as men dêr yn de keamer sit hat men in prachtich útsjoch oer de Pikmar op it âlde Grou. Mar dochs ik hâld fan it âlde en doe't ik foar de pleats stie om in foto to meitsjen die my dat efkes raer oan, al hoe bliid ik bin mei nammen op pleatsen. Hjir miste ik efkes de âlde namme „Ekema”.

Doe't ik hjir mei de boer, de hear Jelle Schouwstra, oer praette fortelde dy dat syn skoanheit Hindrik de Boer yn 1926 de pleats fortimmerje litten hie en doe dizze nije namme oanbringe litten hie.

Dêrfoar wie it in âld spul mei in lang útboud foarein der foar en ik tink dat der ek noch wol it ien en oar fan it âlde langhûs werom to finen west hawwe sil. Nei oerlevering moat de âlde pleats fan 1668 west ha. Der wurdt nou noch in 70 pounsmiet lân, dat om en by hûs leit, brûkt. Der wurde plm. 28 melke kij hâlden

en dan noch it nedige jongfê. Yn de floreen- en stimkohieren komt de pleats foar as Ekema mei nû. 69.

- 1640 Pastory Grou eigener.
- 1698 Sibolt Richeus oer Johannes Beima's erven eigener; Gerben Willems brûker.
- 1708 Selde eigener en brûker.
- 1718 Juff. Agata van Peima, widd. Van Scheltinga eignerske; Gerben Willems brûker.
- 1728 Johannes en Anthonius Durwelle eigners; Gerben Willems en Bouwe Wybes brûker.
- 1738 Bouwe Wytzes eigener; Bouwe Wybes brûker.
- 1748 Van Scheltinga, eigener; Bouwe Wybes brûker.
- 1758 De hear A. C van Scheltinga eigener; Bouwe Wybes brûker.
- 1768 Pastory Grou eigener; Doeke Klazes brûker. Nou wurdt Ekema neamd by stim nû. 68.
- 1778 Pastory Grou eigener; Doeke Klazes widd. brûker.
- 1788 As yn 1778.
- 1798 Old grytman C. van Scheltinga eigener; Auke Abes brûker.
- 1818 S. van Haersma eigener; Auke Abes de Boer brûker.
- 1828 Eigener as yn 1818; Jan Hendriks Westra brûker.

- 1838 Eigener as yn 1818; Jan Hendriks Westra brûker.
- 1848 De erven fan Petrus Adrianus Bergsma by Idaerd nû. 8 eigener; Jan Hendriks Westra brûker.
- 1858 Geertruida Fedder, frou fan Jan Jacob Bruins eignerske; Age Braak brûker.

Oant safier de floreenkohieren. Neistlizzers wiene oan 'e eastkant Ypkjen Bruinsma, oan 'e west- en súdkant de Pikmar en oan 'e noardkant J. E. Simons. Hwa't der nei Age Braak wenne hat wit ik net, mar yn it lêst fan de foarige ieu wenen Johannes Gooies Brouwer en

Japke Reins Jonker dêr, dy't yn 1877 troud binne. Tjeerd Hiemstra en Marijke van der Wal ha har opfolgers west.

Fan 1920—1921 hat widd. Keizer der wenne.

Fan 1921—1946 wenen Hendrik de Boer en Nieske Beeksma der en fan 1946—1965 wenje Jelle Schouwstra en Roelofje de Boer der.

Nei de fortimmering fan 1926 is it in moaije pleats wurden, dy't dêr gesellich stiet oan 'e kant fan 'e mar. Ik wol de famylje Schouwstra dêr noch mannich goed jier tawinskje.

d. H.